

Na osnovu člana 30. stav (1) tačka d) i stav (2) i člana 34. Zakona o plaćama i naknadama u institucijama Bosne i Hercegovine ("Službeni glasnik BiH", br. 50/08 i 35/09), člana 50. stav 1. Zakona o radu u institucijama Bosne i Hercegovine ("Službeni glasnik BiH", br. 26/04, 7/05 i 48/05) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 91. sjednici, održanoj 17. juna 2009. godine, donijelo je

ODLUKU

O NAČINU I POSTUPKU OSTVARIVANJA PRAVA NA NAKNADU ZA BOLOVANJE U INSTITUCIJAMA BOSNE I HERCEGOVINE

Član 1. (Predmet Odluke)

Ovom Odlukom uređuje se način i postupak ostvarivanja prava zaposlenih u institucijama Bosne i Hercegovine na naknadu za bolovanje, u skladu sa članom 34. Zakona o plaćama i naknadama u institucijama Bosne i Hercegovine i članom 50. stav 1. Zakona o radu u institucijama Bosne i Hercegovine.

Član 2. (Visina naknade)

- (1) Zaposleni u institucijama Bosne i Hercegovine ima pravo na naknadu za vrijeme privremene spriječenosti za rad (bolovanja) do 30 dana u visini osnovne neto plaće isplaćene za prethodni mjesec izuzimajući novčanu nagradu i naknadu za obavljanje poslova drugog radnog mjesta.
- (2) Za obračun naknade za vrijeme privremene spriječenosti za rad (bolovanja) preko 30 dana primjenjuju se propisi koji uređuju ovu oblast prema mjestu uplate doprinosa zaposlenog.

Član 3. (Način dokazivanja privremene spriječenosti za rad)

- (1) Da bi zaposleni ostvario pravo na naknadu za vrijeme privremene spriječenosti za rad (bolovanja), potrebno je da dostavi Izvještaj o trajanju privremene spriječenosti za rad izdato od strane nadležne zdravstvene ustanove, a kojim se dokazuje da je isti bio privremeno spriječen za rad u periodu odsutnosti s posla.
- (2) Zaposleni je dužan dostaviti Izvještaj iz stava (1) ovog člana nadležnoj službi budžetskog korisnika najkasnije do početka obračuna plaće za mjesec u kome je zaposleni bio privremeno spriječen za rad (bolovanje).

Član 4. (Obračun i isplata naknade)

Obračun i isplata naknade za vrijeme privremene spriječenosti za rad (bolovanja) za zaposlene u institucijama Bosne i Hercegovine vrši se uz mjesečni obračun i isplatu plaća i naknada zaposlenih u institucijama Bosne i Hercegovine na osnovu Izvještaja iz člana 3. stav (1) ove Odluke.

Član 5. (Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 6. (Stupanje na snagu)

Odluka stupa na snagu narednog dana od dana objavljivanja u "Službenom glasniku BiH".

VM broj 171/09
17. juna 2009. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.
